

Pfannehouer 2005

Es sind emol zwei Müller gsi, der erscht isch en Wyssmüller gsi, und de zweit en Chnochemehl-Müller, die hend zeme e Fuettermittel-Firma gha, wo 's demit die halb Welt abgfüetteret hend. Mit de Zitt hends denn au no diversifiziert und hend nebedem Chnochemehl-Mohle au no künsttliche Chnoche gmacht, für d Hüft und so, und de eint hett als Mister Wyss z Amerika gmülleret und de ander als Mister Müller z'Europa und so.

S Fuettermittel-Business hends ihrne drei Söhn übergeh, am Winfried, am Edwin und em Frank. Aber ei gmeinsams Hobby hends allewil no gha: All Tag hends ihri schöni fetti Geiss uf d Weid tribe, bis die plötzlich wi us häiterem Himmel emoll gmeckeret hett: Ich bin so satt, ich mag kein Blatt, Klää, Klää ! Und ab sofort hett si au kai Milch meh geh, und Fuetter vo Wyssmüller und Co hett si au verschmäht.

Es hett alles nünt genutzt. Die zwäi hend die Gäiss uf die schönschte Matte chönne führe, uf d Schützematte i de Schtadt oder uf die Schön grünen Wise vor de Schtadt mit de drei Chlee-Hügel oder uf di nöi Progymatte, wo susch nu d Geisse vo de Reichenau töfed weide. Aber immer hetts ghäisse: Ich mag kein Blatt Klää, Klää.

Aber au di andere Tier, all die liebe Chnocheschöfli und Chrankekassemüusli und alli andere Milchchüe vo de Nation, wo suscht so brav ihres Wyssmüller-Fuetter gfuetteret und riichlich Milch geh hend, hend äifach nüme wölle wie vorher.

Die drei Cousins hend gschspannet, dass öppis nüme gliich isch i de Welt und mit de Fuettermittel und hend sich wi üblich zunere Vorwärtsstrategie entschlosse. Sie hend mit de UBS abandelt, hend sich gegesitig zu CEO's ernent und hend sich ab sofort Winfried Euro, Edwin Yen und Frank Dollar Mueller gnennt, und denn hends e nöii Firma gründet mit ihrne Aafangsbuechstabe W-E-F, und drum hett die WEF ghäisse, WORLD EGOCENTRIC FOOD Company.

Und denn hends sofort Manager cho loh, usem Schwabeland, usem Blairland, us Microsoftinie, usem Iraketeland, us Genonie, aber vor allem usem Fuettermittelgscheft, Condoleezas Rice Company, Bush-Bohne Konsortium, Nestlé Antibreast usw. Zletscht hends no d Polizei und s Militär grüeft, und denn hends agfange Lösige sueche. Wie cha mer erräiche, dass alli uf de Welt wider brav alles fressed, wo me ne vorsetzt und brav wider Milch gend, damit me wider chan nöis Fuetter produziere, undsowiiter. So quasi profitable recycling, oder.

Jo, s'isch schwierig gsi und d Lag dramatisch. Mittlerweile hend nemli au d Rinder dä Wahnsinn nüme mittgmacht und d Vögel hend d Gripp übercho.

Aber scho bald hett sich es Konsortium gmeldet, wo fröhlich verchündet hett: Jä, losed emoll alli zämme, mir hänn e Lösig, mir hänn ein TISCHLEIN DECK DICH, das schtellt mer aifach irgendwo aane, und denne läuft das wie vorem sälber. Also, hend all gruefe, here demit. Mien aifach e Momäntli no warte, s'isch e NOVARTISchli.

All hend gschtuunet, und wo denn die Lüüt gruefe hend: Tischlein deck dich, isch plötzlich alles volle Waar gsi, alles hett glenzt und isch gross und farbig gsi, und plötzlich isch en riise Schwarm vo schwarze Rabe-Chraie uf da Tischli abegschoche, alli Chraie vom Kanton Bern, und hinedri d Frau Zölch mit em Flobert, und die Chraie hend alles uufgfresse, schwuppdiwupp und chraidwai und rübis und schtübis - und denn sinds uf ds Mool alli zäme tot an Bode n use glege.

Ou, hett d Schwab gsäit, de hett immer no öppis gsäit, wenn die andere nünt meh gsait hend, ou, das isch doch nöd öppe GVO ? Jä, irgend e Schponsore-Nutze miend mir au generiere, oder ? hend die Lüüt vom Novartischli gsäit. Aber irgendwie isch da nüme zur Diskussion gschtande.

Als Nöchtscht sinds zumene Psycho-Food-Guru, de hett scho als Beroter bi ENRON Karriere gmacht gha. Just a moment, hett de gsäit, igk muss noch die Geist und die höhere Strahlungen anrufen. Natel unser, der du bist in die Brusttasche, geheiliget werde deine Marke, dein Klingelton komme, deine Verbindung geschehe, im Mobilnetz wie im Festnetz. Gib uns heute unsere tägliche Info, und vergib uns unsere Call-Schulden, wie auch wir vergeben denen, die uns eine Anruf schulden. Und verführe uns nicht zum Suchen, sondern öffne unsere SMS, Save My Soul, denn dein ist die Reichweite, und der Power und die Megahertzlichkeit, von Marktanteil zu Marktanteil - NOKIA !

Halt emol, hett de Schwab grüeft, üsere Sponsor isch denn Motorola ! Aber nigt bei mir, hett de Guru gsäit. Igk sehe eine grosse braune Sack, eine ganz einfache Sack, das ist die Lösung, und in diese Sack ist eine - looks like a Baseball -- eine Knüppel, und mit diese Knüppel, wenn all those bad guys kommen, die nickt wollen essen von World Egocentric Food, dann ---

Ou näi, hör uuf, denn fangets wider aa tanze und Musig mache und theäterle, und Streetparade und so, hemmer alls scho duregmacht, wäisch wie, tuusig Tschugger, jede mit some Chnüppel und zwüschedure tüends chäschperle, wäisch wie piinlich.

Denn isch es lang wider schtille blibe, bis denn de Frank Dollar Müller gsäit hett: Jo ich hetti do no en Esel, de funktioniert wi en Bancomat, nu dass nöd vorne Geld usehunnt, sondern hinedraa luuter Goldschtückli. Aber da chönnt me jo denn wechsele wi bim Nationalbank-Gold.

Jo wa, wiso hesch da nüd früener gsäit ? Ich han ebe de PIN-CODE vergesse. Es isch irgend öppis ganz gschids und aifachs. Jo, kai Problem, hett de Schwab gsäit, mir sind jo guet mit aifache, gschiide Sache. Und denn hends ghirnet und schtudiert und gsüüzget vor Aaschtrenngig, WEF, WEF, hetts gmacht, und denn hett ein gsäit: GLOBALISIERIG!

Und tatsächlich, sofort hetts bim Esel agfange hinenuse - jo aber, äifach da wo bi jedem verbäinige Esel hinenuse chunnt, wens use mues, und bi dene mit zwäi Bäi genau gliich. Und gschmöckt hetts au entschprechend. TERRORISMUSBEKÄPMPFIG hett sofort äine grüeft, und bim Esel hetts wider gmacht: pff, pff, und e zwäiti Ladig isch usecho, gfürchig hetts gschtungge, WETTBEWERB, pff, REINGWINN VERDOPPLE UND UND SCHTÜÜRE HALBIERE, pff, pff, und so en lange Lulatsch mitere Hoggenase hett gsäit: RENTENALTÈRE ASCHTUNDESZISCH, pff hetts gmacht, und damoll mit französischem Parfüm, und denn hends wild durenand grüeft, denn hett ein gsäit, ZVIIL USSLENDER, aber das hett ehnder Verwirrig gschtiftet bi all dene Lüüt us de ganze Welt, nu de Esel hett agfange wiehere und hett witter pfundet, DENN HALT USSLENDER GLOBALISIERE, aber da hett au nu pffff.

Ufs Mool hett äin hinefüre grüeft, äin mit eme wollene Lismer, wo au suscht eso usgseh hett, wie wenn er nöd wör genau dezuepasse, uf ds Moll hett de grüeft: VASELLA ! Und all hend ume-glueget. Je näi, hett de gsäit, ich hann wenigstens no ETHISCHI GRUNDSETZ. Ehnder PO-Ethischi, wenn ich so lueg, wa bi dem Esel hine usehunnt, hett de mit em Lismer gsäit. Und de Vasella hett gsäit, denn lueget Sie doch gschider bim GATES SIM BROWSER-MONOPOL, und de hett grüeft, and what about OIL FOR NAHRUNGSMITTEL, und die hend grüeft, gönd zu de FUESSBALLWETTEMAFIA, und eso hends immer wiiter gruefe, und de armi Esel hett pfundet und pfundet, bis nu na Luft cho isch, er isch völlig uuspumpet und leer gsi, und genau so sinds denn au umen ume gschtande wie d Berner Tschugger um die schpanisch Botschaft.

Es wär wohrschiins no lang eso wiitergange, wenn nüd de Schwab plötzlich gsäit hett: Ou mir verpassed denn öppe no de Sharon Stone ihren Apéro. Da sind all ufgjuckt und devogrennt, nu äin hett no bim Verbijucke gsäit: Denn lösed mer da halt morn vorem Zmorge, und denn sinds all ewägg gsi. Nu de Esel und d Gäiss sind no dogschtande und hend enand aagluaet.

Jojo, hett de Esel gsäit, denn wönds die ganz Welt mänätsche, aber vo Tuten und Blase hends kai Ahnig, din Hungerschträik, liebi Gäiss, hends überhaupt nöd tschegget, und min Riise-Aaschiss grad au nöd. Si selber baued de gröscht Schaiss, und denn söll ich si so quasi zum Saich uus schiisse. Ich glaub, dene mömmer d Bremer Schtadtmusikante verbiischicke, öppis anders hilft do nüme. Aber zerscht gömmer in d Beiz, ich han e riise Loch im Buch.

Die vom WEF hend bi Cüpli, Lachs- und Kaviarbrötli wiiter ihri gschiide Rede gschwunge - dasch au aifacher gsii ohni Esel und pffff und so, und wens nonig gschtorbe sind, denn sinds allwäg immer no draa.

So, liebi Chinde, hend er öie Monsanto-Haberbrai ggässe und brav Zehndli putzt, und s Meersoili gfütteret ? Also denn sofort ab is Bettli, und troimet recht süess vo Eselsohre und Gaissfüess!